

Nipisanniarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 18, 31. oktober 1996-imeersumi § 10 a, § 10 b, § 13, imm. 2, § 23, imm. 1, § 33, imm. 2 aamma § 34, imm. 3 malillugit, kingullermillu aalisarneq pillugu Inatsisartut inatsisaatigut nr. 28, 28. november 2016-imeersukkut allanngortinneqartukkat aalajangersarneqarpoq:

Atuuffia

§ 1. Nalunaarummi pineqarpoq tunngaviusumik killeqarfiup avataani 3 sømilimiittup sineriaallu akornanni sumiiffimmi Kalaallit Nunaata aalisarnikkut oqartussaaffigisaani nipisanniarneq (Cyclopterus lumpus).

Aqutsiveqarfiit

§ 2. Nipisanniarnermi aqutsiveqarfiit ilanngussaq 1-mi aalajangersarneqarput.

Nassuiaatit

§ 3. Nalunaarummi matumani uku imatut paasineqassapput:

- "Piffissaq aalisarfusoq" ullut aalisarfusut 60-it ataqtigiissuut.
- "Usinik nuussineq" pisanik taakkuninngaluunniit tunisassianik angallammiittunik umiatsiaaqqamiittunilluunniit angallammut umiatsiaaqqamulluunniit allamut nuunneqartut tamarmik, nuunneqartut usit tamarmiunersut usilluunniit ilaannarineraat apeqqutaatinngu.

Akuersissut

§ 4. Inuussutissarsiutigalugu nipisanniarnermi aalisarsinnaanermut akuersissut qinnuteqartoqarnera malillugu Aalisarnermut Piniarnermullu Naalakkersuisoqarfimmit tunniunneqartartoq piumasaqaataavoq.

Imm. 2. Qinnuteqarnermut immersugassaq www.sullissivik.gl-mi pissarsiarineqarsinnaasoq qinnuteqartunit atorineqassaq.

Imm. 3. Ukiumi pisassiiffusumi ataatsimi aqutsiveqarfinnut marlunnut akuersissummik qinnuteqartoqarsinnaavoq. Aqutsiveqarfik sumiiffik qinnuteqartup najugaqarfia kiisalu aqutsiveqarfik sumiiffik sanilerisaq.

Imm. 4. Aalisarsinnaanermut akuersissutit piffissamut killiligaapput annerpaamillu pisarineqarsinnaasunut akuerineqartunut attuumassuteqaratik.

Imm. 5. Angallatinut inuussutissarsiutigalugu nipisanniartunut, aalisarnermut angallat atorneqartussaq qinnuteqartup pigippagu akuersissut aatsaat tunniunneqassaaq.

Pisassiissutit piffissarlu aalisarfiusoq

§ 5. Aqutsiveqarfinnut ilanngussaq 1-mi aalajangersarneqartut naapertorlugit nipisannik pisassiissutinik ukiut tamaasa Naalakkersuisut aalajangiisarput.

§ 6. Aalisarnermut Piniarnermullu Naalakkersuisoqarfimmit aalisarnermut piffissami aalajangersarneqartumi inuussutissarsiutigalugu arnarlunnik nipisanniarneq taamaallaat akuerisaavoq, tak. § 8, imm. 1

§ 7. Inuussutissarsiutigalugu inuussutissarsiutigagulu angusallunnik nipisanniarneq piffissami 31. januar 31. marts ilanngullugu taamaallaat akuerisaavoq, taamaattoorli tak. imm. 2.

Imm. 2. Piffissani aalisarfiussani Aalisarnermut Piniarnermullu Naalakkersuisoqarfimmit nipisannut arnarlunnut aalajangiiffiusuni aamma inuussutissarsiutigalugu inuussutissarsiutigagulu angusallunnik nipisanniarneq akuerisaavoq, tak. § 8, imm. 1.

§ 8. Aqutsiveqarfinni ataasiakkaani tamani, tak. ilanngussaq 1, najukkani tunitsiveqarfit aalisartullu peqatigiiffinit sinniisaasa oqaloqatigereernerini, inuussutissarsiutigalugu arnarlunnik nipisanniarnermi piffissat aalisarfissat qaqugu aallartinneqassanersut Aalisarnermut Piniarnermullu Naalakkersuisoqarfik aalajangissaaq, tak. § 7, imm. 2.

Imm. 2. Aallartinnissamut ulluliunneqartoq tamanut saqqummiunneqartinnagu aalisarnerup aallartinnissaanut piumasagaatit pillugit naammassineqarsimanersut aalisartut ataasiakkaat misissuinissaanut Naalakkersuisoqarfik akuersissuteqarsinnaavoq.

Imm. 3. Arnarlunnik nipisanniarnermut piffissaq aalisarfiussaq piffissami 1. april 16. Juli ilanngullugu aallartinneqarsinnaavoq.

§ 9. Aqutsiveqarfinni ataasiakkaani tamani piffissat aalisarfiusut pisassiissutillu pillugit nalunaarutit, tusagassiutitigut aamma Naalakkersuisut nittartagaatigut Aalisarnermut Piniarnermullu Naalakkersuisoqarfimmit nalunaarutigineqassapput. Taamatut pisassat tamarmik pisarineqarnerat nalunaarutigineqassaaq.

Imm. 2. Aalisarnermut Piniarnermullu Naalakkersuisoqarfiup aqutsiveqarfimmi ataatsimi piffissap aalisarfiusup naanerata kingorna pisassiissutit pisarineqanngitsut aqutsiveqarfimmut allamut nuussinnaavai.

Imm. 3. Aqutsiveqarfimmi pineqartumi nipisanniarnermut piffissat aalisarfiussat aallartinnissaat kingusinnerpaamik sapaatip akunnera sioqqullugu Aalisarnermut Piniarnermullu Naalakkersuisoqarfiup nalunaarutigissavai.

Usinik nuussineq

§ 10. Aalisarsinnaanermut akuersissuteqartup nammineq umiatsiaaraata aamma nammineq angallataata akornanni usinik nuussisinnaanermut akuersissut aalisarsinnaanermut akuersissuteqartup angallataa inuussutissarsiutigalugu aalisariutaappat Aalisarnermut Piniarnermullu Naalakkersuisoqarfimmit tunniunneqassaaq.

Imm. 2. Usinik nuussisinnaanermut akuersissut aalisarsinnaanermut akuersissummi tunniunneqartumi takuneqarsinnaassaaq.

Imm. 3. Usinik nuussineq nalunaaruteqartussaaitaanermut ilaanngilaq.

Inuussutissarsiutigiginagu nipisanniarneq

§ 11. Inuussutissarsiutigiginagu nipisanniarnermut atatillugu amerlanerpaamik qassutit marluk atorineqassapput.

Imm. 2. Piujuartitsineq siunertaralugu aalisarnerup teknikikkut iluarsartuussivigineqarnera pillugu nalunaarummi sukkulluunniit atuuttumi nigartat angisussaak akuerisaasut takuneqarsinnaapput.

§ 12. Inuussutissarsiutigalugu arnarlunnik nipisanniarnermut piffissami aalisarfiusussatut aalajangiiffusumi tassani taamaallaat inuussutissarsiutigiginagu arnarlunnik nipisanniarneq akuerisaavoq, tak. § 8, imm. 1.

Atortunik qalluineq qassutinillu qimaannakkanik qaqitsineq

§ 13. Aalisarnek unitsinneqarpat nammineq atortorisat ingerlaannaq qaqqinneqassapput.

Imm. 2. Piffissap aalisarfiusup taamaatininnerani atortut qaqqinneqanngitsut pisortanit qaqqinneqarsinnaapput. Atortut qaqqinneqassapput piginnittup akiligassaanik, taassuma kinaanera paasineqarsinnaapput.

§ 14. Qassutit aalisarnerup unitsinneqarnerata kingorna ullut arfineq marluk kingorna qaqqinneqarnikuunngitsut qassutinik uninngatitsiinnartoq kinaassusersineqarsinnaanngippat inunnit namminerisamik qaqqinneqarsinnaapput tigummiinnarneqarlutillu.

Pineqaatissiinerit

§ 15. § 4, imm. 1-mik, §§ 6, 7, 10, 11, 12 aamma 13-mik unioqqutitsineq pinerluttulerineq pillugu inatsimmi malittarisassat malillugit akiliisitsinikkut arsaarinninnikkullu pineqaatissiinerimik kinguneqarsinnaavoq.

Imm. 2. Ingerlatseqatigiiffit il. il. (inatsisitigut akisussaaffimmik tigummiartut) pinerluttulerinermut inatsimmi malittarisassat malillugit akiliisitaasinnaapput arsaarneqarsinnaallutillu.

Imm. 3. Akiliisitsissutit tak. imm. 1 aamma 2 Nunatta Karsianut tutsinneqassapput.

Atuutilersitsinermut atorunnaarsitsinermullu aalajangersakkat

§ 16. Nalunaarutip nalunaarutigineqareernerata aqaguani atortilissaaq.

Imm. 2. Nipisanniarneq pillugu Namminersorlutik Oqartussat nalunaarutaat nr. 22, 22. juni 2021-meersoq atorunnaarsinneqarpoq.

Namminersorlutik Oqartussat, ulloq 9. februar 2024

Kim Kielsen (atsior.)

Aalisarnermut Piniarnermullu Naalakkersuisoq

/ Emanuel Rosing (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut